

L'éra euntràn marts et l'éra très djôr qu'ou neéit comme sè l'ósse volù veni rouja ; yè n'éra dja euna biéhta qui fajéit bel et poèra. Lo mai qui donéit a pensà l'éra què deseut, la nei vèya, l'éra tôtta dura : l'éra franc lo tens di combie.

Sus pè lo Creht i aón franc franc fechteuye pè tsit dou Pin qui éron sus è Cre-Forné entó euna rendja dè meinayón. I ômmo dou Creht i an pamài pochù refenà : li Tric, li Galàn, Frantsét, Lercò èn veèn què lo tens promettéit 'ncô rèn dè sè levà, i sè son armà dè pale, d'un per dè loüedje entó lo pontón et un per dè payatse et i sè son betà èn tchumìn. Y'est alà quaje teut l'aprè-denà pè arreuvà è Cre-Forné. 'ncô què tsit dou Pin i an viù tôte tsette brave djèn lo cour ou y'a euvrì et i an remartsia lo bon Dieu perquè i comentsavon franc dè avé ben maténs.

Èn un vir dè man li meinà i son ichtà ben acouatà et ben gropà si loüedje ; i an betà foura li béhte et i sè son modà tut djus ou Creht ; i son arreuvà què l'éra bel et noit.

Tôte li fameye i sè son ehtregnù un tsô pè poé, euntre tut, aberdjà djèn et béhte pè quahque djôr. Eben, tsa méma noit, dou sondjón da quèva di Fontan-e s'est dehtacà euna combia qui a portà vià li miète dè tsit dou Pin.